

॥ श्री ॥

समयसार

आ. कुन्दकुन्द · प्राकृत · २२१ पद्य · ~३३ मिनट · आंशिक पाठ

स्रोत-टंकण अभी आंशिक है — लगभग 221/415 पद्य उपलब्ध; शेष जुड़ते ही यह पृष्ठ स्वतः पूर्ण होगा

मंगलाचरण

वंदितु सव्वसिद्धे धुवमचलमणोवमं गदिं पत्ते ।
वोच्छामि समयपाहुडमिणमो सुदकेवलीभणिदं ॥1॥

पीठिका

जीवो चरित्तदंसणणाणट्ठिदो तं हि ससमयं जाण ।
पोग्गलकम्मपदेसट्ठिदं च तं जाण परसमयं ॥2॥

एयत्तणिच्छयगदो समओ सव्वत्थ सुन्दरो लोए ।
बंधकहा एयत्ते तेण विसंवादिणी होदि ॥3॥

सुदपरिचिदाणुभूदा सव्वस्स वि कामभोगबंधकहा ।
एयत्तस्सुवलंभो णवरि ण सुलहो विहत्तस्स ॥4॥

तं एयत्तविहत्तं दाएहं अप्पणो सविहवेण ।
जदि दाएज्ज पमाणं चुक्केज्ज छलं ण घेत्तव्वं ॥5॥

णवि होदि अप्पमत्तो ण पमत्तो जाणओ दु जो भावो ।

एवं भणंति सुद्धं णाओ जो सोउ सो चेव ॥6॥

ववहारेणुवदिस्सदि णाणिस्स चरित्तं दंसणं णाणं ।

ण वि णाणं ण चरित्तं ण दंसणं जाणगो सुद्धो ॥7॥

जह ण वि सक्कमणज्जो अणज्जभासं विणा दु गाहेदुं ।

तह ववहारेण विणा परमत्थुवदेसणमसक्कं ॥8॥

जो हि सुदेणहिगच्छदि अप्पाणमिणं तु केवलं सुद्धं ।

तं सुदकेवलिमिसिणो भणंति लोयप्पदीवयरा ॥9॥

जो सुदणाणं सव्वं जाणदि सुदकेवलिं तमाहु जिणा ।

णाणं अप्पा सव्वं जम्हा सुदकेवली तम्हा ॥10॥

णाणम्हि भावणा खलु कादव्वा दंसणे चरित्ते य ।

ते पूण तिण्णिवि आदा तम्हा कुण भावणं आदे ॥11॥

जो आदभावणमिणं णिच्चुवजुत्तो मुणी समाचरदि ।

सो सव्व-दुक्ख-मोक्खं पावदि अचिरेण कालेण ॥12॥

नव-पदार्थ अधिकार

ववहारोभूदत्थो भूदत्थो देसिदो दु सुद्धणओ । (11)

भूदत्थमस्सिदो खलु सम्मादिट्ठी हवदि जीवो ॥13॥

जीव अधिकार

सुद्धो सुद्धादेसो णादव्वो परमभावदरिसीहिं । (12)

ववहारदेसिदा पुण जे दु अपरमे ढिदा भावे ॥14॥

भूदत्थेणाभिगदा जीवाजीवा य पुण्णपावं च । (13)

आसवसंवरणिज्जरबंधो मोक्खो य सम्मत्तं ॥15॥

जो पस्सदि अप्पाणं अबद्धपुट्ठं अणण्णयं णियदं । (14)

अविसेसमसंजुत्तं तं सुद्धणयं वियाणीहि ॥16॥

जो पस्सदि अप्पाणं अबद्धपुट्ठं अणण्णमविसेसं । (15)

अपदेससंतमज्झं पस्सदि जिणसासणं सव्वं ॥17॥

आदा खु मज्झ णाणे आदा मे दंसणे चरित्ते य ।

आदा पच्चक्खाणे आदा मे संवरे जोगे ॥18॥

दंसणणाणचरित्ताणि सेविदव्वाणि साहुणा णिच्चं । (16)

ताणि पुण जाण तिण्णि वि अप्पाणं चेव णिच्छयदो ॥19॥

जह णाम को वि पुरिसो रायाणं जाणिऊण सद्दहदि । (17)

तो तं अणुचरदि पुणो अत्थत्थीओ पयत्तेण ॥20॥

एवं हि जीवराया णादव्वो तह य सद्दहेदव्वो । (18)

अणुचरिदव्वो य पुणो सो चेव दु मोक्खकामेण ॥21॥

कम्मे णोकम्महि य अहमिदि अहकं च कम्म णोकम्मं । (19)

जा एसा खलु बुद्धी अप्पडिबुद्धो हवदि ताव ॥22॥

जीवेव अजीवे वा संपदि समयम्हि जत्थ उवजुत्तो ।

तत्थेव बंधमोक्खो हवदि समासेण णिद्धिट्ठो ॥23॥

जं कुणदि भावामादा कत्ता सो होदि तस्स भावस्स ।

णिच्छयदो ववहारा पोग्गलकम्माण कत्तारं ॥24॥

अहमेदं एदमहं अहमेदस्सम्हि अत्थि मम एदं । (20)

अण्णं जं परदव्वं सच्चित्ताचित्तमिस्सं वा ॥25॥

आसि मम पुव्वमेदं एदस्स अहं पि आसि पुव्वं हि । (21)

होहिदि पुणो ममेदं एदस्स अहं पि होस्सामि ॥26॥

एयं तु असभूदं आदवियप्पं करेदि संमूढो । (22)

भूदत्थं जाणंतो ण करेदि दु तं असंमूढो ॥27॥

अण्णाणमोहिदमदी मज्झमिणं भणदि पोग्गलं दव्वं । (23)

बद्धमबद्धं च तहा जीवो बहुभावसंजुत्तो ॥28॥

सव्वण्हुणाणदिट्ठो जीवो उवओगलक्खणो णिच्चं । (24)

कह सो पोग्गलदव्वीभूदो जं भणसि मज्झमिणं ॥29॥

जदि सो पोग्गलदव्वीभूदो जीवत्तमागदं इदरं । (25)

तो सक्को वत्तुं जे मज्झमिणं पोग्गलं दव्वं ॥30॥

जदि जीवो ण सरीरं तित्थयरायरियसंथुदी चेव । (26)

सव्वा वि हवदि मिच्छा तेण दु आदा हवदि देहो ॥31॥

ववहारणओ भासदि जीवो देहो य हवदि खलुएक्को । (27)

ण दु णिच्छयस्स जीवो देहो य कदा वि एक्कट्ठो ॥32॥

इणमण्णं जीवादो देहं पोग्गलमयं थुणित्तु मुणी । (28)

मण्णदि हु संथुदो वंदिदो मए केवली भयवं ॥33॥

तं णिच्छये ण जुज्जदि ण सरीरगुणा हि होति केवलिणो । (29)

केवलिगुणो थुणदि जो सो तच्चं केवलिं थुणदि ॥34॥

णयरम्मि वण्णिदे जह ण वि रण्णो वण्णणा कदा होदि । (30)

देहगुणे थुव्वंते ण केवलिगुणा थुदा होति ॥35॥

जो इन्दिये जिणित्ता णाणसहावाधियं मुणदि आदं । (31)

तं खलु जिदिंदियं ते भणंति जे णिच्छिदा साहू ॥36॥

जो मोहं तु जिणित्ता णाणसहावाधियं मुणदि आदं । (32)

तं जिदमोहं साहुं परमट्टवियाणया बेति ॥37॥

जिदमोहस्स दु जइया खीणो मोहो हविज्ज साहुस्स । (33)

तइया हु खीणमोहो भण्णदि सो णिच्छयविदूहिं ॥38॥

सव्वे भावे जम्हा पच्चक्खाई परेत्ति णादूणं । (34)

तम्हा पच्चक्खाणं णाणं णियमा मुणेदव्वं ॥39॥

जह णाम कोवि पुरिसो परदव्वमिणंति जाणिदुं चयदि । (35)

तह सव्वे परभावे णाऊण विमुञ्चदे णाणी ॥40॥

णत्थि मम को वि मोहो बुज्झदि उवओग एव अहमेक्को । (36)

तं मोहणिम्ममत्तं समयस्स वियाणया बेति ॥41॥

णत्थि मम धम्म आदी बुज्झदि उवओग एव अहमेक्को । (37)

तं धम्मणिम्ममत्तं समयस्स वियाणया बेति ॥42॥

अहमेक्को खलु सुद्धो दंसणणाणमइयो सदारूवी । (38)

ण वि अत्थि मज्झ किंचि वि अण्णं परमाणुमेतं पि ॥43॥

अजीव अधिकार

अप्पाणमयाणंता मूढा दु परप्पवादिणो केई । (39)

जीवं अज्झवसाणं कम्मं च तहा परूवेति ॥44॥

अवरे अज्झवसाणेसु तिव्वमंदाणुभागगं जीवं । (40)

मण्णंति तहा अवरे णोकम्मं चावि जीवोत्ति ॥45॥

कम्मस्सुदयं जीवं अवरे कम्माणुभागमिच्छंति । (41)

तिव्वत्तणमंदत्तणगुणेहिं जो सो हवदि जीवो ॥46॥

जीवो कम्मं उहयं दोण्णि वि खलु केइ जीवमिच्छंति । (42)

अवरे संजोगेण दु कम्माणं जीवमिच्छंति ॥47॥

एवंविहा बहुविहा परमप्पाणं वदंति दुम्मेहा । (43)

ते ण परमट्ठवादी णिच्छयवादीहिं णिद्धिठ्ठा ॥48॥

एदे सव्वे भावा पोग्गलदव्वपरिणामणिप्पण्णा । (44)

केवलिजिणेहिं भणिया कह ते जीवो त्ति वुच्चंति ॥49॥

अट्ठविहं पि य कम्मं सव्वं पोग्गलमयं जिणा बेति । (45)

जस्स फलं तं वुच्चदि दुक्खं ति विपच्चमाणस्स ॥50॥

ववहारस्स दरीसणमुवएसो वण्णिदो जिणवरेहिं । (46)

जीवा एदे सव्वे अज्झवसाणादओ भावा ॥51॥

राया हु णिग्गदो त्ति य एसो बलसमुदयस्स आदेसो । (47)

ववहारेण दु उच्चदि तत्थेक्को णिग्गदो राया ॥52॥

एमेव य ववहारो अज्झवसाणादिअण्णभावाणं । (48)

जीवो त्ति कदो सुत्ते तत्थेक्को णिच्छिदो जीवो ॥53॥

अरसमरूवमगंधं अव्वत्तं चेदणागुणमसद्धं । (49)

जाण अलिंगग्गहणं जीवमणिद्धिसंठाणं ॥54॥

जीवस्स णत्थि वण्णो ण वि गंधो ण वि रसो ण वि य फासो । (50)

ण वि रूवं ण सरीरं ण वि संठाण ण संहणणं ॥55॥

जीवस्स णत्थि रागो ण वि दोसो णेव विज्जदे मोहो । (51)

णो पच्चया ण कम्मं णोकम्मं चावि से णत्थि ॥56॥

जीवस्स णत्थि वग्गो ण वग्गणा णेव फट्ठया केई । (52)

णो अज्झप्पट्ठाणा णेव य अणुभागठाणाणि ॥57॥

जीवस्स णत्थि केई जोयट्ठाणा ण बंधठाणा वा । (53)

णेव य उदयट्ठाणा ण मग्गणट्ठाणया केई ॥58॥

णो ठिदिबंधट्ठाणा जीवस्स ण संकिलेसठाणा वा । (54)

णेव विसोहिट्ठाणा णो संजमलद्धिठाणा वा ॥59॥

णेव य जीवट्ठाणा ण गुणट्ठाणा य अत्थि जीवस्स । (55)

जेण दु एदे सव्वे पोग्गलदव्वस्स परिणामा ॥60॥

ववहारेण दु एदे जीवस्स हवन्ति वण्णमादीया । (56)

गुणठाणंता भावा ण दु केई णिच्छयणयस्स ॥61॥

एदेहिं य सम्बन्धो जहेव खीरोदयं मुणेदव्वो । (57)

ण य होति तस्स ताणि दु उवओगगुणाधिगो जम्हा ॥62॥

पंथे मुस्संतं पस्सिदूण लोगा भणन्ति ववहारी । (58)

मुस्सदि एसो पंथो ण य पंथो मुस्सदे कोई ॥63॥

तह जीवे कम्माणं णोकम्माणं च पस्सिदुं वण्णं । (59)

जीवस्स एस वण्णो जिणेहिं ववहारदो उत्तो ॥64॥

गंधरसफासरूवा देहो संठाणमाइया जे य । (60)

सव्वे ववहारस्स य णिच्छयदण्हू ववदिसन्ति ॥65॥

तत्थ भवे जीवाणं संसारत्थाणं होंति वण्णादि । (61)

संसारपमुक्काणं णत्थि हु वण्णादओ केई ॥66॥

जीवो चेव हि एदे सव्वे भाव त्ति मण्णसे जदि हि । (62)

जीवस्साजीवस्स य णत्थि विसेसो दु दे कोई ॥67॥

अह संसारत्थाणं जीवाणं तुज्झ होंति वण्णादी । (63)

तम्हा संसारत्था जीवा रूवित्तमावण्णा ॥68॥

एवं पोग्गलदव्वं जीवो तहलक्खणेण मूढमदी । (64)

णिव्वाणमुवगदो वि य जीवत्तं पोग्गलो पत्तो ॥69॥

एक्कं च दोण्णि तिण्णि य चत्तारि य पंच इन्दिया जीवा । (65)

बादरपज्जत्तिदरा पयडीओ णामकम्मस्स ॥70॥

एदाहि य णिव्वत्ता जीवट्ठाणा उ करणभूदाहिं । (66)

पयडीहिं पोग्गलमइहिं ताहिं कहं भण्णदे जीवो ॥71॥

पज्जत्तापज्जत्ता जे सुहुमा बादरा य जे चेव । (67)

देहस्स जीवसण्णा सुत्ते ववहारदो उत्ता ॥72॥

मोहणकम्मस्सुदया दु वण्णिया जे इमे गुणट्ठाणा । (68)

ते कह हवन्ति जीवा जे णिच्चमचेदणा उत्ता ॥73॥

कर्ता-कर्म अधिकार

जाव ण वेदि विसेसंतरं तु आदासवाण दोहं पि । (69)

अण्णाणी ताव दु सो कोहादिसु वट्टदे जीवो ॥74॥

कोहादिसु वट्टंतस्स तस्स कम्मस्स संचओ होदी । (70)

जीवस्सेवं बंधो भणिदो खलु सव्वदरिसीहिं ॥75॥

जइया इमेण जीवेण अप्पणो आसवाण य तहेव । (71)

णादं होदि विसेसंतरं तु तइया ण बंधो से ॥76॥

णादूण आसवाणं असुचित्तं च विवरीयभावं च । (72)

दुक्खस्स कारणं ति य तदो णियत्तिं कुणदि जीवो ॥77॥

अहमेक्को खलु सुद्धो णिम्ममओ णाणदंसणसमग्गो । (73)

तम्हि ठिदो तच्चित्तो सव्वे एदे खयं णेमि ॥78॥

जीवणिबद्धा एदे अधुव अणिच्चा तहा असरणा य । (74)

दुक्खा दुक्खफलात्ति य णादूण णिवत्तदे तेहिं ॥79॥

कम्मस्स य परिणामं णोकम्मस य तहेव परिणामं । (75)

ण करेदि एदमादा जो जाणदि सो हवदि णाणी ॥80॥

कत्ता आदा भणिदो ण य कत्ता केण सो उवाएण ।

धम्मादी परिणामे जो जाणदि सो हवदि णाणी ॥81॥

ण वि परिणमदि ण गिण्हदि उप्पज्जदि णपरदव्वपज्जाए । (76)

णाणी जाणंतो वि हु पोग्गलकम्मं अणेयविहं ॥82॥

ण वि परिणमदि ण गिण्हदि उप्पज्जदि ण परदव्वपज्जाए । (77)

णाणी जाणंतो वि हु सगपरिणामं अणेयविहं ॥83॥

ण वि परिणमदि ण गिण्हदि उप्पज्जदि ण परदव्वपज्जाए । (78)

णाणी जाणंतो वि हु पोग्गलकम्मप्फलमणंतं ॥84॥

ण वि परिणमदि ण गिण्हदि उप्पज्जदि ण परदव्वपज्जाए । (79)

पोग्गलदव्वं पि तहा परिणमदि सएहिं भावेहिं ॥85॥

जीवपरिणामहेदुं कम्मत्तं पोग्गला परिणमंति । (80)

पोग्गलकम्मणिमित्तं तहेव जीवो वि परिणमदि ॥86॥

ण वि कुव्वदि कम्मगुणे जीवो कम्मं तहेव जीवगुणे । (81)

अण्णोण्णणिमित्तेण दु परिणामं जाण दोण्हं पि ॥87॥

एदेण कारणेण दु कत्त आदा सएण भावेण । (82)

पोग्गलकम्मकदाणं ण दु कत्त सव्वभावाणं ॥88॥

णिच्छयणयस्स एवं आदा अप्पाणमेव हि करेदि । (83)

वेदयदि पुणो तं चेव जाण अत्ता दु अत्ताणं ॥89॥

ववहारस्स दु आदा पोग्गलकम्मं करेदि णेयविहं । (84)

तं चेव पुणो वेयइ पोग्गलकम्मं अणेयविहं ॥90॥

जदि पोग्गलकम्ममिणं कुव्वदि तं चेव वेदयदि आदा । (85)

दोकिरियावदिरित्ते पसज्जदे सो जिणावमदं ॥91॥

जम्हा दु अत्तभावं पोग्गलभावं च दो वि कुव्वंति । (86)

तेण दु मिच्छादिट्ठी दोकिरियावादिणो होति ॥92॥

पुग्गलकम्मणिमित्तं जह आदा कुणदि अप्पणो भावं ।

पुग्गलकम्मणिमित्तं तह वेददि अप्पणो भावं ॥93॥

मिच्छत्तं पुण दुविहं जीवमजीवं तहेव अण्णाणं । (87)

अविरदि जोगो मोहो कोहादीया इमे भावा ॥94॥

पोग्गलकम्मं मिच्छं जोगो अविरदि अण्णाणमज्जीवं । (88)

उवओगो अण्णाणं अविरदि मिच्छं च जीवो दु ॥95॥

उवओगस्स अणाई परिणामा तिण्णि मोहजुत्तस्स । (89)

मिच्छत्तं अण्णाणं अविरदिभावो य णादव्वो ॥96॥

एदेसु य उवओगो तिविहो सुद्धो णिरंजणो भावो । (90)

जं सो करेदि भावं उवओगो तस्स सो कत्ता ॥97॥

जं कुणदि भावमादा कत्ता सो होदि तस्स भावस्स । (91)

कम्मत्तं परिणमदे तम्हि सयं पोग्गलं दव्वं ॥98॥

परमप्पाणं कुव्वं अप्पाणं पि य परं करितो सो । (92)

अण्णाणमओ जीवो कम्माणं कारगो होदि ॥99॥

परमप्पाणमकुव्वं अप्पाणं पि य परं अकुव्वंतो । (93)

सो णाणमओ जीवो कम्माणमकारगो होदि ॥100॥

तिविहो एसुवओगो अप्पवियप्पं करेदि कोहोऽहं । (94)

कत्ता तस्सुवओगस्स होदि सो अत्तभावस्स ॥101॥

तिविहो एसुवओगो अप्पवियप्पं करेदि धम्मादी । (95)

कत्ता तस्सुवओगस्स होदि सो अत्तभावस्स ॥102॥

एवं पराणि दव्वाणि अप्पय कुणदि मंदबुद्धीओ । (96)

अप्पाणं अवि य परं करेदि अण्णाणभावेण ॥103॥

एदेण दु सो कत्ता आदा णिच्छयविदूहिं परिकहिदो । (97)

एवं खलु जो जाणदि सो मुञ्चदि सव्वकत्तितं ॥104॥

ववहारेण दु आदा करेदि घडपडरधाणि दव्वाणि । (98)

करणाणि य कम्माणि य णोकम्माणीह विविहाणि ॥105॥

जदि सो परदव्वाणि य करेज्ज णियमेण तम्मओ होज्ज । (99)

जम्हा ण तम्मओ तेण सो ण तेसिं हवदि कत्ता ॥106॥

जीवो ण करेदि घडं णेव पडं णेव सेसगे दव्वे । (100)

जोगुवओगा उप्पादगा य तेसिं हवदि कत्ता ॥107॥

जे पोग्गलदव्वाणं परिणामा होति णाणआवरणा । (101)

ण करेदि ताणि आदा जो जाणदि सो हवदि णाणी ॥108॥

जं भावं सुहमसुहं करेदि आदा स तस्स खलु कत्ता । (102)

तं तस्स होदि कम्मं सो तस्स दु वेदगो अप्पा ॥109॥

जो जम्हि गुणे दव्वे सो अण्णम्हि दु ण संकमदि दव्वे । (103)

सो अण्णमसंकंतो कह तं परिणामए दव्वं ॥110॥

दव्वगुणस्स य आदा ण कुणदि पुग्गलमयहि कम्महि । (104)

तं उभयमकुव्वंतो तम्हि कहं तस्स सो कत्ता ॥111॥

जीवम्हि हेदुभूदे बंधस्स दु पस्सिदूण परिणामं । (105)

जीवेण कदं कम्मं भण्णदि उवयारमेत्तेण ॥112॥

जोधेहिं कदे जुद्धे राएण कदंति जंपदे लोगो । (106)

ववहारेण तह कदं णाणावरणादि जीवेण ॥113॥

उप्पादेदि करेदि य बंधदि परिणामएदि गिण्हदि य । (107)

आदा पोग्गलदव्वं ववहारणयस्स वत्तव्वं ॥114॥

जह राया ववहारा दोसगुणुप्पादगो त्ति आलविदो । (108)

तह जीवो ववहारा दव्वगुणुप्पादगो भणिदो ॥115॥

सामण्णपच्चया खलु चउरो भण्णंति बंधकत्तरो । (109)

मिच्छत्तं अविरमणं कसायजोगा य बोद्धव्वा ॥116॥

तेसिं पुणो वि य इमो भणिदो भेदो दु तेरसवियप्पो । (110)

मिच्छादिट्ठी आदी जाव सजोगिस्स चरमंतं ॥117॥

एदे अचेदणा खलु पोग्गलकम्मुदयसंभवा जम्हा । (111)

ते जदि करेंति कम्मं ण वि तेसिं वेदगो आदा ॥118॥

गुणसण्णिदा दु एदे कम्मं कुव्वंति पच्चया जम्हा । (112)

तम्हा जीवोऽकत्त गुणा य कुव्वंति कम्माणि ॥119॥

जह जीवस्स अणण्णुवओगो कोहो वि तह जदि अणण्णो । (113)

जीवस्साजीवस्स य एवमणण्णत्तमावण्णं ॥120॥

एवमिह जो दु जीवो सो चेव दु णियमदो तहाऽजीवो । (114)

अयमेयत्ते दोसो पच्चयणोकम्मकम्माणं ॥121॥

अह दे अण्णो कोहो अण्णुवओगप्पगो हवदि चेदा । (115)

जह कोहो तह पच्चय कम्मं णोकम्ममवि अण्णं ॥122॥

जीवे ण सयं बद्धं ण सयं परिणमदि कम्मभावेण । (116)

जइ पोग्गलदव्वमिणं अप्परिणामी तदा होदि ॥123॥

कम्मइयवग्गणासु य अपरिणमंतीसु कम्मभावेण । (117)

संसारस्स अभावो पसज्जदे संखसमओ वा ॥124॥

जीवो परिणामयदे पोग्गलदव्वाणि कम्मभावेण । (118)

ते सयमपरिणमंते कहं णु परिणामयदि चेदा ॥125॥

अह सयमेव हि परिणमदि कम्मभावेण पोग्गलं दव्वं । (119)

जीवो परिणामयदे कम्मं कम्मत्तमिदि मिच्छा ॥

णियमा कम्मपरिणदं कम्मं चिय होदि पोग्गलं दव्वं । (120)

तह तं णाणावरणाइपरिणदं मुणसु तच्चेव ॥

ण सयं बद्धो कम्मे ण सयं परिणमदि कोहमादीहिं । (121)

जइ एस तुज्झ जीवो अप्परिणामी तदा होदि ॥126॥

अपरिणमंतम्हि सयं जीवे कोहादिएहिं भावेहिं । (122)

संसारस्स अभावो पसज्जदे संखसमओ वा ॥127॥

पोग्गलकम्मं कोहो जीवं परिणामएदि कोहत्तं । (123)

तं सयमपरिणमंतं कहं णु परिणामयदि कोहो ॥128॥

अह सयमप्पा परिणमदि कोहभावेण एस दे बुद्धी । (124)

कोहो परिणामयदे जीवं कोहत्तमिदि मिच्छा ॥129॥

कोहुवजुत्ते कोहो माणवजुत्ते य माणमेवादा । (125)

माउवजुत्ते माया लोहुवजुत्ते हवदि लोहो ॥130॥

जो संगं तु मुइत्ता जाणदि उवओगमप्पगं सुद्धं ।
तं णिस्संगं साहुं परमट्टवियाणया विन्ति ॥131॥
जो मोहं तु मुइत्ता णाणसहावाधियं मुणदि आदं ।
तं जिदमोहं साहुं परमट्टवियाणया विन्ति ॥132॥
जो धम्मं तु मुइत्ता जाणदि उवओगमप्पगं सुद्धं ।
तं धम्मसंगमुक्कं परमट्टवियाणया विन्ति ॥133॥

जं कुणदि भावमादा कत्ता सो होदि तस्स कम्मस्स । (126)
णाणिस्स स णाणमओ अण्णाणमओ अणाणिस्स ॥134॥

अण्णाणमओ भावो अणाणिणो कुणदि तेण कम्माणि । (127)
णाणमओ णाणिस्स दु ण कुणदि तम्हा दु कम्माणि ॥135॥

णाणमया भावाओ णाणमओ चेव जायदे भावो । (128)
जम्हा तम्हा णाणिस्स सव्वे भावा हु णाणमया ॥136॥
अण्णाणमया भावा अण्णाणो चेव जायदे भावो । (129)
जम्हा तम्हा भावा अण्णाणमया अणाणिस्स ॥137॥

कणयमया भावादो जायंते कुण्डलादओ भावा । (130)
अयमयया भावादो जह जायंते दु कडयादी ॥138॥
अण्णाणमया भावा अणाणिणो बहुविहा वि जायंते । (131)
णाणिस्स दु णाणमया सव्वे भावा तहा होति ॥139॥

अण्णाणस्स स उदओ जा जीवाणं अतच्चउवलद्धी । (132)

मिच्छत्तस्स दु उदओ जीवस्स असद्दहाणत्तं ॥140॥

उदओ असंजमस्स दु जं जीवाणं हवेइ अविरमणं । (133)

जो दु कलुसोवओगो जीवाणं सो कसाउदओ ॥141॥

तं जाण जोग उदयं जो जीवाणं तु चिट्ठउच्छाहो । (134)

सोहणमसोहण वा कायव्वो विरदिभावो वा ॥142॥

एदेसु हेदुभूदेसु कम्मइयवग्गणागदं जं तु । (135)

परिणमदे अट्ठविहं णाणावरणादिभावेहिं ॥143॥

तं खलु जीवणिबद्धं कम्मइयवग्गणागदं जइया । (136)

तइया दु होदि हेदू जीवो परिणामभावानं ॥144॥

जीवस्स दु कम्मेण य सह परिणामा हु होंति रागादी । (137)

एवं जीवो कम्मं च दो वि रागादिमावण्णा ॥145॥

एकस्स दु परिणामो जायदि जीवस्स रागमादीहिं । (138)

ता कम्मोदयहेदूहिं विणा जीवस्स परिणामो ॥146॥

जइ जीवेण सह च्चिय पोग्गलदव्वस्सकम्मपरिणामो । (139)

एवं पोग्गलजीवा हु दो वि कम्मत्तमावण्णा ॥

एकस्स दु परिणामो पोग्गलदव्वस्स कम्मभावेण । (140)

ता जीवभावहेदूहिं विणा कम्मस्स परिणामो ॥147॥

जीवे कम्मं बद्धं पुट्ठं चेदि ववहारणयभणिदं । (141)

सुद्धणयस्स दु जीवे अबद्धपुट्ठं हवदि कम्मं ॥148॥

कम्मं बद्धमबद्धं जीवे एवं तु जाण णयपक्खं । (142)

पक्खादिककंतो पुण भण्णदि जो सो समयसारो ॥149॥

दोण्ह वि णयाण भणिदं जाणदि णवरं तु समयपडिबद्धो । (143)

ण दु णयपक्खं गिण्हदि किंचि वि णयपक्खपरिहीणो ॥150॥

सम्मद्वंसणणाणं एसो लहदि त्ति णवरि ववदेसं । (144)

सव्वणयपक्खरहिदो भणिदो जो सो समयसारो ॥151॥

पुण्य-पाप अधिकार

कम्ममसुहं कुसीलं सुहकम्मं चावि जाणह सुसीलं । (145)

कह तं होदि सुसीलं जं संसारं पवेसेदि ॥152॥

सोवण्णियं पि णियलं बंधदि कालायसं पि जह पुरिसं । (146)

बंधदि एवं जीवं सुहमसुहं वा कदं कम्मं ॥153॥

तम्हा दु कुसीलेहि य रागं मा कुणह मा व संसग्गं । (147)

साहीणो हि विणासो कुसीलसंसग्गरायेण ॥154॥

जह णाम कोवि पुरिसो कुच्छियसीलं जणं वियाणित्त । (148)

वज्जेदि तेण समयं संसग्गं रागकरणं च ॥155॥

एमेव कम्मपयडीसीलसहावं च कुच्छिदं णादुं । (149)

वज्जंति परिहरंति य तस्संसग्गं सहावरदा ॥156॥

रत्तो बंधदि कम्मं मुच्चदि जीवो विरागसंपत्तो । (150)

एसो जिणोवदेसो तम्हा कम्मेसु मा रज्ज ॥157॥

परमट्ठो खलु समओ सुद्धो जो केवली मुणी णाणी । (151)

तम्हि ट्ठिदा सहावे मुणिणो पावंति णिव्वाणं ॥158॥

परमट्टमि दु अठिदो जो कुणदि तवं वदं च धारेदि । (152)

तं सव्वं बालतवं बालवदं बेति सव्वण्हू ॥159॥

वदणियमाणि धरंता सीलाणि तहा तवं च कुव्वंता । (153)

परमट्टबाहिरा जे णिव्वाणं ते ण विंदंति ॥160॥

परमट्टबाहिरा जे ते अण्णाणेण पुण्णमिच्छंति । (154)

संसारगमणहेदुं पि मोक्खहेदुं अजाणंता ॥161॥

जीवादीसद्दहणं सम्मत्तं तेसिमधिगमो णाणं । (155)

रागादीपरिहरणं चरणं एसो दु मोक्खपहो ॥162॥

मोत्तूण णिच्छयट्ठं ववहारेण विदुसा पवट्ठंति । (156)

परमट्टमस्सिदाण दु जदीण कम्मक्खओ विहिओ ॥163॥

वत्थस्स सेदभावो जह णासेदि मलमेलणासत्तो । (157)

मिच्छत्तमलोच्छण्णं तह सम्मत्तं खु णादव्वं ॥164॥

वत्थस्स सेदभावो जह णासेदि मलमेलणासत्तो । (158)

अण्णाणमलोच्छण्णं तह णाणं होदि णादव्वं ॥165॥

वत्थस्स सेदभावो जह णासेदि मलमेलणासत्तो । (159)

कसायमलोच्छण्णं तह चारित्तं पि णादव्वं ॥166॥

सो सव्वणाणदरिसी कम्मरण णियेणावच्छण्णो । (160)

संसारसमावण्णो ण विजाणदि सव्वदो सव्वं ॥167॥

सम्मत्तपडिणिबद्धं मिच्छत्तं जिणवरेहि परिकहियं । (161)

तस्सोदयेण जीवो मिच्छादिट्ठि त्ति णादव्वो ॥168॥

णाणस्स पडिणिबद्धं अण्णाणं जिणवरेहि परिकहियं । (162)

तस्सोदयेण जीवो अण्णाणी होदि णादव्वो ॥169॥

चारित्तपडिणिबद्धं कसायं जिणवरेहि परिकहियं । (163)

तस्सोदयेण जीवो अचरित्तो होदि णादव्वो ॥170॥

आसव अधिकार

मिच्छत्तं अविरमणं कसायजोगा य सण्णसण्णा दु । (164)

बहुविहभेया जीवे तस्सेव अणण्णपरिणामा ॥171॥

णाणावरणादीयस्स ते दु कम्मस्स कारणं होति । (165)

तेसिं पि होदि जीवो य रागदोसादिभावकरो ॥172॥

णत्थि दु आसवबंधो सम्मादिट्ठिस्स आसवणिरोहो । (166)

संते पुव्वणिबद्धे जाणदि सो ते अबंधतो ॥173॥

भावो रागादिजुदो जीवेण कदो दु बंधगो भणिदो । (167)

रागादिविप्पमुक्को अबंधगो जाणगो णवरि ॥174॥

पक्के फलमिहि पडिए जह ण फलं बज्झए पुणो विंटे । (168)

जीवस्स कम्मभावे पडिए ण पुणोदयमुवेदि ॥175॥

पुढवीपिंडसमाणा पुव्वणिबद्धा दु पच्चया तस्स । (169)

कम्मसरीरेण दु ते बद्धा सव्वे वि णाणिस्स ॥176॥

चउविह अणेयभेयं बंधंते णाणदंसणगुणेहिं । (170)

समए समए जम्हा तेण अबंधो ति णाणी दु ॥177॥

जम्हा दु जहण्णादो णाणगुणादो पुणो वि परिणमदि । (171)

अण्णत्तं णाणगुणो तेण दु सो बंधगो भणिदो ॥178॥

दंसणणाणचरित्तं जं परिणमदे जहण्णभावेण । (172)

णाणी तेण दु बज्झदि पोग्गलकम्मेण विविहेण ॥179॥

सव्वे पुव्वणिबद्धा दु पच्चया अत्थि सम्मदिट्ठिस्स । (173)

उवओगप्पाओगं बंधंते कम्मभावेण ॥180॥

होदूण णिरुवभोज्जा तह बंधदि जह हवंति उवभोज्जा । (174)

सत्तट्ठविहा भूदा णाणावरणादिभावेहिं ॥181॥

संता दु णिरुवभोज्जा बाला इत्थी जहेह पुरिसस्स । (175)

बंधदि ते उवभोज्जे तरुणी इत्थी जह णरस्स ॥182॥

एदेण कारणेण दु सम्मादिट्ठी अबंधगो भणिदो । (176)

आसवभावाभावे ण पच्चया बंधगा भणिदा ॥183॥

रागो दोसो मोहो य आसवा णत्थि सम्मदिट्ठिस्स । (177)

तम्हा आसवभावेण विणा हेदू ण पच्चया होति ॥184॥

हेदू चदुव्वियप्पो अट्ठवियप्पस्स कारणं भणिदं । (178)

तेसिं पि य रागादी तेसिमभावे ण बज्झंति ॥185॥

जह पुरिसेणाहारो गहिदो परिणमदि सो अणेयविहं । (179)

मंसवसारुहिरादी भावे उदरग्सिंजुत्ते ॥186॥

तह णाणिस्स दु पुव्वं जे बद्धा पच्चया बहुवियप्पं । (180)

बज्झंते कम्मं ते णयपरिहीणा दु ते जीवा ॥187॥

संवर अधिकार

उवओगे उवओगे कोहादिसु णत्थि को वि उवओगे । (181)

कोहो कोहे चेव हि उवओगे णत्थि खलु कोहो ॥188॥

अट्ठवियप्पे कम्मे णोकम्मे चावि णत्थि उवओगे । (182)

उवओगम्हि य कम्मं णोकम्मं चावि णो अत्थि ॥189॥

एदं दु अविवरीदं णाणं जइया दु होदि जीवस्स । (183)

तइया ण किंचि कुव्वदि भावं उवओगसुद्धप्पा ॥190॥

जह कणयमग्गितवियं पि कणयभावं ण तं परिच्चयदि । (184)

तह कम्मोदयतविदो ण जहदि णाणी दु णाणित्तं ॥191॥

एवं जाणदि णाणी अण्णाणी मुणदि रागमेवादं । (185)

अण्णाणतमोच्छण्णो आदसहावं अयाणंतो ॥192॥

सुद्धं तु वियाणंतो सुद्धं चेवप्पयं लहदि जीवो । (186)

जाणंतो दु असुद्धं असुद्धमेवप्पयं लहदि ॥193॥

अप्पाणमप्पणा रुंधिरुण दोपुण्णपावजोएसु । (187)

दंसणणाणाहि ठिदो इच्छाविर ओ य अण्णाहि ॥194॥

जो सव्वसंगमुक्को झायदि अप्पाणमप्पणो अप्पा । (188)

णवि कम्मं णोकम्मं चेदा चेयेइ एयत्तं ॥195॥

अप्पाणं झायंतो दंसणणाणमओ अणण्णमओ । (189)

लहइ अचिरेण अप्पाणमेव सो कम्मपविमुक्कं ॥196॥

उवदेसेण परोक्खं रूवं जह पस्सिदूण णादेदि ।

भण्णदि तहेव घिप्पदि जीवो दिट्ठो य णादो य ॥197॥

कोविदिदच्छो साहू संपडिकाले भणिज्ज रूवमिणं ।

पच्चक्खमेव दिट्ठं परोक्खणाणे पवट्ठंतं ॥198॥

तेसिं हेदू भणिदा अज्झवसाणाणि सव्वदरिसीहिं । (190)

मिच्छत्तं अण्णाणं अविरयभावो य जोगो य ॥199॥

हेदुअभावे णियमा जायदि णाणिस्स आसवणिरोहो । (191)

आसवभावेण विणा जायदि कम्मस्स वि णिरोहो ॥200॥

कम्मस्साभावेण य णोकम्माणं पि जायदि णिरोहो । (192)

णोकम्मणिरोहेण य संसारणिरोहणं होदि ॥201॥

निर्जरा अधिकार

उवभोगमिंदियेहिं दव्वाणमचेदणाणमिदराणं । (193)

जं कुणदि सम्मदिट्ठी तं सव्वं णिज्जरणिमित्तं ॥202॥

दव्वे उवभुंजंते णियमा जायदि सुहं व दुक्खं वा । (194)

तं सुहदुक्खमुदिण्णं वेददि अध णिज्जरं जादि ॥203॥

जह विसमुवभुंजंतो वेज्जो पुरिसो ण मरणमुवयादि । (195)

पोग्गलकम्मस्सुदयं तह भंजुदि णेव बज्झदे णाणी ॥204॥

जह मज्जं पिबमाणो अरदीभावेण मज्जदि ण पुरिसो । (196)

दव्वुवभोगे अरदो णाणी वि ण बज्झदि तहेव ॥205॥

सेवंतो वि ण सेवदि असेवमाणो वि सेवगो कोई । (197)

पगरणचेट्ठा कस्स वि ण य पायरणो त्ति सो होदि ॥206॥

पोगलकम्मं रागो तस्स विवागोदओ हवदि एसो । (199)
ण दु एस मज्ज भावो जाणगभावो हु अहमेक्को ॥207॥

कह एस तुज्झ ण हवदि विविहो कम्मोदयफलविवागो ।
परदव्वाणुवओगो ण हु देहो हवदि अण्णाणी ॥208॥

एवं सम्मादिट्ठी अप्पाणं मुणदि जाणगसहावं । (200)
उदयं कम्मविवागं च मुयदि तच्चं वियाणंतो ॥209॥

उदयविवागो विविहो कम्माणं वण्णिदो जिणवरेहिं । (198)
ण दु ते मज्झ सहावा जाणगभावो दु अहमेक्को ॥210॥

परमाणुमित्तयं पि हु रागादीणं तु विज्जदे जस्स । (201)
ण वि सो जाणदि अप्पाणयं तु सव्वागमधरो वि ॥211॥
अप्पाणमयाणंतो अणप्पयं चावि सो अयाणंतो । (202)
कह होदि सम्मदिट्ठी जीवाजीवे अयाणंतो ॥212॥

जो वेददि वेदिज्जदि समए समए विणस्सदे उभयं । (216)
तं जाणगो दु णाणी उभयं पि ण कंखदि कयावि ॥213॥

बंधुवभोगणिमित्ते अज्झवसाणोदएसु णाणिस्स । (217)
संसारदेहविसएसु णेव उप्पज्जदे रागो ॥214॥

मज्झं परिग्गहो जइ तदो अहमजीवदं तु गच्छेज्ज । (208)
णादेव अहं जह्मा तह्मा ण परिग्गहो मज्झ ॥215॥

आदह्मि दव्वभावे अपदे मोत्तूण गिण्ह तह णियदं । (203)
थिरमेगमिमं भावं उवलभंतं सहावेण ॥216॥

को णाम भणिज्ज बुहो परदव्वं मम इमं हवदि दव्वं । (207)

अप्पाणमप्पणो परिगहं तु णियदं वियाणंतो ॥217॥

छिज्जदु वा भिज्जदु वा णिज्जदु वा अहव जादु विप्पलयं । (209)

जम्हा तम्हा गच्छदु तहवि हु ण परिग्गहो मज्झ ॥218॥

एदम्हि रदो णिच्चं संतुट्ठो होहि णिच्चमेदम्हि । (206)

एदेण होहि तित्ते होहदि तुह उत्तमं सोक्खं ॥219॥

आभिणिसुदोधिमणकेवलं च तं होदि एक्कमेव पदं । (204)

सो ऐसो परमट्ठो जं लहिदुं णिव्वुदिं जादि ॥220॥

णाणगुणेण विहीणा एदं तु पदं बहुवि ण लहंते । (205)

तं गिण्ह णियदमेदं जदि इच्छसि कम्मपरिमोक्खं ॥221॥

अपरिग्गहो अणिच्छो भणिदो णाणी य णेच्छदे धम्मं । (210)

अपरिग्गहो दु धम्मस्स जाणगो तेण सो होदि ॥222॥

अपरिग्गहो अणिच्छो भणिदो णाणी य णेच्छदि अधम्मं । (211)

अपरिग्गहो अधम्मस्स जाणगो तेण सो होदि ॥223॥

धम्मत्थि अधम्मत्थी आयासं सुत्तमंग-पुव्वेसु ।

संगं च तहा णेयं दुयमणु अतिरियणेरइयं ॥224॥

अपरिग्गहो अणिच्छो भणिदो णाणी य णेच्छदे असणं । (212)

अपरिग्गहो दु असणस्स जाणगो तेण सो होदि ॥225॥

अपरिग्गहो अणिच्छो भणिदो णाणी य णेच्छदे पाणं । (213)

अपरिग्गहो दु पाणस्स जाणगो तेण सो होदि ॥226॥

एमादिए दु विविहे सव्वे भावे य णेच्छदे णाणी । (214)

जाणगभावो णियदो णीरालंबो दु सव्वत्थ ॥227॥

उप्पण्णोदय भोगो वियोगबुद्धीए तस्स सो णिच्चं । (215)

कंखामणागदस्स य उदयस्स ण कुव्वदे णाणी ॥228॥

णाणी रागप्पजहो सव्वदव्वेसु कम्ममज्झगदो । (218)

णो लिप्पदि रजएण दु कद्दममज्झे जहा कणयं ॥229॥

अण्णाणी पुण रत्ते सव्वदव्वेसु कम्ममज्झगदो । (219)

लिप्पदि कम्मरएण दु कद्दममज्झे जहा लोहं ॥230॥

णागफणीए मूलं णाइणितोएण गभ्भणागेण ।

णागं होइ सुवण्णं धम्मंतं भच्छवाएण ॥231॥

कम्मं हवेइ किट्ठं रागादि कालिया अह विभाओ ।

सम्मत्तणाणचरणं परमोसहमिदि वियाणाहि ॥232॥

झाणं हवेइ अग्गी तवयरणं भत्तली समक्खादो ।

जीवो हवेइ लोहं धमियव्वो परमजोईहिं ॥233॥

भुंजंतस्स वि विविहे सच्चित्तचित्तामिस्सिए दव्वे । (220)

संखस्स सेदभावो ण वि सक्कदि किण्हगो कादुं ॥234॥

तह णाणिस्स वि विविहे सच्चित्तचित्तामिस्सिए दव्वे । (221)

भुंजंतस्स वि णाणं ण सक्कमण्णाणदं णेदुं ॥235॥

जइया स एव संखो सेदसहावं तयं पजहिदूण । (222)

गच्छेज्ज किण्हभावं तइया सुक्कत्तणं पजहे ॥236॥

तह णाणी वि हु जइया णाणसहावं तयं पजहिदूण । (223)

अण्णाणेण परिणदो तइया अण्णाणदं गच्छे ॥238॥

पुरिसो जह को वि इहं वित्तिणिमित्तं तु सेवदे रायं । (224)

तो सो वि देदि राया विविहे भोगे सुहुप्पाए ॥239॥

एमेव जीवपुरिसो कम्मरयं सेवदे सुहणिमित्तं । (225)

तो सो वि देदि कम्मो विविहे भोगे सुहुप्पाए ॥240॥

जह पुण सो च्चिय पुरिसो वित्तिणिमित्तं ण सेवदे रायं । (226)

तो सो ण देदि राया विविहे भोगे सुहुप्पाए ॥241॥

एमेव सम्मादिट्ठी विसयत्थं सेवदे ण कम्मरयं । (227)

तो सो ण देदि कम्मो विविहे भोगे सुहुप्पाए ॥242॥

सम्मादिट्ठी जीवा णिस्संका होंति णिभया तेण । (228)

सत्तभयविप्पमुक्का जम्हा तम्हा दु णिस्संका ॥243॥

जो चत्तारि वि पाए छिंददि ते कम्मबंधमोहकरे । (229)

सो णिस्संको चेदा सम्मादिट्ठी मुणेदव्वो ॥244॥

जो दु ण करेदि कंखं कम्मफलेसु तह सव्वधम्मेषु । (230)

सो णिक्कंखो चेदा सम्मादिट्ठी मुणेदव्वो ॥245॥

जो ण करेदि दुगुंछं चेदा सव्वेसिमेव धम्माणं । (231)

सो खलु णिव्विदिगिच्छो सम्मादिट्ठी मुणेदव्वो ॥246॥

जो हवदि असम्मूढो चेदा सद्दिट्ठि सव्वभावेसु । (232)

सो खलु अमूढदिट्ठी सम्मादिट्ठी मुणेदव्वो ॥247॥

जो सिद्धभत्तिजुत्तो उवगूहणगो दु सव्वधम्माणं । (233)

सो उवगूहणकारी सम्मादिट्ठी मुणेदव्वो ॥248॥

उम्मगं गच्छतं सगं पि मग्गे ठवेदि जो चेदा । (234)

सो ठिदिकरणजुत्तो सम्मादिट्ठी मुणेदव्वो ॥249॥

जो कुणदि वच्छलत्तं तिण्हं साहूण मोक्खमग्गम्हि । (235)

सो वच्छलभावजुदो सम्मादिट्ठी मुणेदव्वो ॥250॥

विज्जारहमारूढो मणोरहपहेसु भमइ जो चेदा । (236)

सो जिणणाणपहावी सम्मादिट्ठी मुणेदव्वो ॥251॥

बंध अधिकार

रागादिकतैं कर्मकौ, बन्ध जानि मुनिराय । ।

तजैं तिनहिं समभाव करि, नमूँ सदा तिन पाँय ॥

जह णाम को वि पुरिसो णेहभत्ते दु रेणुबहुलम्मि । (237)

ठाणम्मि ठाइदूण य करेदि सत्थेहिं वायामं ॥252॥

छिंदति भिंददि य तहा तालीतलकयलिवंसपिंडीओ । (238)

सच्चित्तचित्तणं करेदि दव्वाणमुवघादं ॥253॥

उवघादं कुव्वंतस्स तस्स णाणाविहेहिं करणेहिं । (239)

णिच्छयदो चिंतेज्ज हु किंपच्चयगो दु रयबंधो ॥254॥

जो सो दु णेहभावो तम्हि णरे तेण तस्स रयबंधो । (240)

णिच्छयदो विण्णेयं ण कायचेट्ठाहिं सेसाहिं ॥255॥

एवं मिच्छादिट्ठी वट्ठंतो बहुविहासु चिट्ठासु । (241)

रागादी उवओगे कुव्वंतो लिप्पदि रएण ॥256॥

जह पुण सो चेव णरो णेहे सव्वम्हि अवणिदे संते । (242)

रेणुबहुलम्मि ठाणे करेदि सत्थेहिं वायामं ॥257॥

छिंददि भिंददि य तहा तालीतलकयलिवंसपिंडीओ । (243)

सच्चित्ताचित्ताणं करेदि दव्वाणमुवघादं ॥258॥

उवघादं कुव्वंतस्स तस्स णाणाविहेहिं करणेहिं । (244)

णिच्छयदो चित्तेज्ज हु किंपच्चयगो ण रयबंधो ॥259॥

जो सो दु णेहभावो तम्हि णरे तेण तस्स रयबंधो । (245)

णिच्छयदो विण्णेयं ण कायचेट्ठाहिं सेसाहिं ॥260॥

एवं सम्मादिट्ठी वट्ठंतो बहुविहेसु जोगेसु । (246)

अकरंतो उवओगे रागादी ण लिप्पदि रएण ॥261॥

जो मण्णदि हिंसामि य हिंसिज्जामि य परेहिं सत्तेहिं । (247)

सो मूढो अण्णाणी णाणी एत्ते दु विवरीदो ॥262॥

आउक्खयेण मरणं जीवाणं जिणवरेहिं पण्णत्तं । (248)

आउं ण हरेसि तुमं कह ते मरणं कदं तेसिं ॥263॥

आउक्खयेण मरणं जीवाणं जिणवरेहिं पण्णत्तं । (249)

आउं ण हरंति तुहं कह ते मरणं कदं तेहिं ।

जो मण्णदि जीवेमि य जीविज्जामि य परेहिं सत्तेहिं । (250)

सो मूढो अण्णाणी णाणी एत्ते दु विवरीदो ।

आऊदयेण जीवदि जीवो एवं भणंति सव्वण्हू । (251)

आउं च ण देसि तुमं कहं तए जीविदं कदं तेसिं ।

आऊदयेण जीवदि जीवो एवं भणंति सव्वण्हू । (252)

आउं च ण दिंति तुहं कहं णु ते जीविदं कदं तेहिं ॥264॥

जोअप्पणा दु मण्णदि दुक्खिदसुहिदे करेमि सत्तेत्ति । (253)

सो मूढो अण्णाणी णाणी एते दु विवरीदो ॥265॥

कम्मोदएण जीवा दुक्खिदसुहिदा हवन्ति जदि सव्वे । (254)

कम्मं च ण देसि तुमं दुक्खिदसुहिदा कह कया ते ॥266॥

कम्मोदएण जीवा दुक्खिदसुहिदा हवन्ति जदि सव्वे । (255)

कम्मं च ण दिति तुहं कदोसि कहं दुक्खिदो तेहिं ॥267॥

कम्मोदएण जीवा दुक्खिदसुहिदा हवन्ति जदि सव्वे । (256)

कम्मं च ण दिति तुहं कह तं सुहिदो कदो तेहिं ॥268॥

जो मरदि जो य दुहिदो जायदि कम्मोदएण सो सव्वो । (257)

तम्हा दु मारिदो दे दुहाविदो चेदि ण हु मिच्छा ॥269॥

जो ण मरदि ण य दुहिदो सो वि य कम्मोदएण चेव खलु । (258)

तम्हा ण मारिदो णो दुहाविदो चेदि ण हु मिच्छा ॥270॥

एसा दु जा मदी दे दुक्खिदसुहिदे करेमि सत्तेत्ति । (259)

एसा दे मूढमदी सुहासुहं बंधदे कम्मं ॥271॥

दुक्खिदसुहिदे सत्ते करेमि जं एवमज्झवसिदं ते । (260)

तं पावबंधगं वा पुण्णस्स व बंधगं होदि ॥272॥

मारिमि जीवावेमि य सत्ते जं एवमज्झवसिदं ते । (261)

तं पावबंधगं वा पुण्णस्स व बंधगं होदि ॥273॥

अज्झवसिदेण बंधो सत्ते मारेउ मा व मारेउ । (262)

एसो बंधसमासो जीवाणं णिच्छयणयस्स ॥274॥

एवमलिए अदत्ते अबंभचेरे परिग्गहे चेव । (263)

कीरदि अज्झवसाणं जं तेण दु बज्झदे पावं ॥275॥

तह वि य सच्चे दत्ते बंभे अपरिग्गहत्तणे चेव । (264)

कीरदि अज्झवसाणं जं तेण दु बज्झदे पुण्णं ॥276॥

वत्थुं पडुच्च जं पुण अज्झवसाणं तु होदि जीवाणं । (265)

ण य वत्थुदो दु बंधो अज्झवसाणेण बंधोत्थि ॥277॥

दुक्खिदसुहिदे जीवे करेमि बंधेमि तह विमोचेमि । (266)

जा एसा मूढमदी णिरत्थया सा हु दे मिच्छा ॥278॥

अज्झवसाणणिमित्तं जीवा बज्झंति कम्मणा जदि हि । (267)

मुच्चंति मोक्खमग्गे ठिदा य ता किं करेसि तुमं ॥279॥

कायेण दुक्खवेमिय सत्ते एवं तु जं मदिं कुणसि । ।

सव्वावि एस मिच्छा दुहिदा कम्मेण जदि सत्ता ॥280॥

वाचाए दुक्खवेमिय सत्ते एवं तु जं मदिं कुणसि । ।

सव्वावि एस मिच्छा दुहिदा कम्मेण जदि सत्ता ॥281॥

मणसाए दुक्खवेमिय सत्ते एवं तु जं मदिं कुणसि । ।

सव्वावि एस मिच्छा दुहिदा कम्मेण जदि सत्ता ॥282॥

सच्छेण दुक्खवेमिय सत्ते एवं तु जं मदिं कुणसि । ।

सव्वावि एस मिच्छा दुहिदा कम्मेण जदि सत्ता ॥283॥

कायेण च वाया वा मणेण सुहिदे करेमि सत्ते ति । ।

एवं पि हवदि मिच्छा सुहिदा कम्मेण जदि सत्ता ॥284॥

सव्वे करेदि जीवो अज्झवसाणेण तिरियणेरइए । (268)

देवमणुए य सव्वे पुण्णं पावं च णेयविहं ॥285॥

धम्माधम्मं च तहा जीवाजीवे अलोगलोगं च । (269)

सव्वे करेदि जीवो अज्झवसाणेण अप्पाणं ॥286॥

एदाणि णत्थि जेसिं अज्झवसाणाणि एवमादीणि । (270)

ते असुहेण सुहेण व कम्मेण मुणी ण लिप्पंति ॥287॥

जा संकप्पवियप्पो ता कम्मं कुणदि असुहसुहजणयं । ।

अप्पसरूवा रिद्धी जाव ण हियए परिप्फुरई ॥288॥

बुद्धी ववसाओ वि य अज्झवसाणं मदी य विण्णाणं । (271)

एक्कट्टमेव सव्वं चित्तं भावो य परिणामो ॥289॥

एवं ववहारणओ पडिसिद्धो जाण णिच्छयणएण । (272)

णिच्छयणयासिदा पुण मुणिणो पावंति णिव्वाण ॥290॥

वदसमिदीगुत्तीओ सीलतवं जिणवरेहि पण्णत्तं । (273)

कुव्वंतो वि अभव्वो अण्णाणी मिच्छदिट्ठी दु ॥291॥

मोक्खं असद्दहंतो अभवियसत्तो दु जो अधीएज्ज । (274)

पाठो ण करेदि गुणं असद्दहंतस्स णाणं तु ॥292॥

सद्दहदि य पत्तेदि य रोचेदि य तह पुणो य फासेदि । (275)

धम्मं भोगणिमित्तं ण दु सो कम्मक्खयणिमित्तं ॥293॥

आयारादी णाणं जीवादी दंसणं च विण्णेयं । (276)

छज्जीवणिकं च तहा भणदि चरित्तं तु व्यवहारो ॥294॥

आदा खु मज्झ णाणं आदा मे दंसणं चरित्तं च । (277)

आदा पच्चक्खाणं आदा मे संवरो जोगो ॥295॥

आधाकम्मादीया पुग्गलदव्वस्स जे इमे दोसा । (286)

कह ते कुव्वदि णाणी परदव्वगुणा हु जे णिच्चं ॥296॥

आधाकम्मादीया पुग्गलदव्वस्स जे इमे दोसा । (287)

कहमणुमण्णदि अण्णेण कीरमाणा परस्स गुणा ॥297॥

आधाकम्मं उद्देसियं च पुग्गलमयं इमं दव्वं ।

कह तं मम होदि कदं जं णिच्चमचेदणं वुत्तं ॥298॥

आधाकम्मं उद्देसियं च पुग्गलमयं इमं दव्वं ।

कह तं मम कारविदं जं णिच्चमचेणं वुत्तं ॥299॥

जह फलिहमणी सुद्धो ण सयं परिणमदि रागामादीहिं । (278)

रंगिज्जदि अण्णेहिं दु सो रत्तादीहिं दव्वेहिं ॥300॥

एवं णाणी सुद्धो ण सयं परिणमदि रागामादीहिं । (279)

राइज्जदि अण्णेहिं दु सो रागादीहिं दोसेहिं ॥301॥

ण य रागदोसमोहं कुव्वदि णाणी कसायभावं वा । (280)

सयमप्पणो ण सो तेण कारगो तेसिं भावाणं ॥302॥

रागम्हि य दोसम्हि य कसायकम्मेसु चेव जे भावा । (281)

तेहिं दु परिणमंतो रागादि बंधदि पुणो वि ॥303॥

रागम्हि य दोसम्हि य कसायकम्मेसु चेव जे भावा । (282)

तेहिं दु परिणमंतो रागादी बंधदे चेदा ॥304॥

अप्पडिकमणं दुविहं अपच्चखाणं तहेव विण्णेयं । (283)

एदेणुवदेसेण य अकारगो वण्णिदो चेदा ॥305॥

अप्पडिकमणं दुविहं दव्वे भावे अपच्चखाणं पि । (284)

एदेणुवदेसेण य अकारगो वण्णिदो चेदा ॥306॥

जावं अप्पडिकमणं अपच्चखाणं च दव्वभावाणं । (285)

कुव्वदि आदा तावं कत्ता सो होदि णादव्वो ॥307॥

मोक्ष अधिकार

जह णाम को वि पुरिसो बंधणयम्हि चिरकालपडिबद्धो । (288)

तिव्वं मंदसहावं कालं च वियाणदे तस्स ॥308॥

जइ णवि कुणदि च्छेदं ण मुच्चदे तेण बंधणवसो सं । (289)

कालेण उ बहुगेण वि ण सो णरो पावदि विमोक्खं ॥309॥

इय कम्मबंधणाणं पदेसठिइपयडिमेवमणुभागं । (290)

जाणंतो वि ण मुच्चदि मुच्चदि सो चेव जदि सुद्धो ॥310॥

जह बंधे चिंतंतो बंधणबद्धो ण पावदि विमोक्खं । (291)

तह बंधे चिंतंतो जीवो वि ण पावदि विमोक्खं ॥311॥

जह बंधे छेत्तूणय बंधणबद्धो दु पावदि विमोक्खं । (292)

तह बंधे छेत्तूणय जीवो संपावदि विमोक्खं ॥312॥

जह बंधे भित्तूणय बंधणबद्धो दु पावदि विमोक्खं ।

तह बंधे भित्तूणय जीवो संपावदि विमोक्खं ॥313॥

जह बंधे मुत्तूणय बंधणबद्धो दु पावदि विमोक्खं ।

तह बंधे मुत्तूणय जीवो संपावदि विमोक्खं ॥314॥

बंधाणं च सहावं वियाणिदुं अप्पणो सहावं च । (293)

बंधेसु जो विरज्जदि सो कम्मविमोक्खणं कुणदि ॥315॥

जीवो बंधो य तहा छिज्जंति सलक्खणेहिं णियएहिं । (294)

पण्णाछेदणएण दु छिण्णा णाणत्तमावण्णा ॥316॥

जीवो बंधो य तहा छिज्जंति सलक्खणेहिं णियएहिं । (295)

बंधो छेददव्वो सुद्धा अप्पा य घेत्तव्वो ॥317॥

कह सो घिप्पदि अप्पा पण्णाए सो दु घिप्पदे अप्पा । (296)

जह पण्णाइ विभत्ते तह पण्णाएव घेत्तव्वो ॥318॥

पण्णाए घित्तव्वो जो चेदा सो अहं तु णिच्छयदो । (297)

अवसेसा जे भावा ते मज्झ परे त्ति णायव्वा ॥319॥

पण्णाए घित्तव्वो जो दट्ठा सो अहं तु णिच्छयदो । (298)

अवसेसा जे भावा ते मज्झ परेत्ति णादव्वा ॥320॥

पण्णाए घित्तव्वो जो णादा सो अहं तु णिच्छयदो । (299)

अवसेसा जे भावा ते मज्झ परेत्ति णादव्वा ॥321॥

पण्णाए घित्तव्वो जो उवलद्धो सो अहं तु णिच्छयदो ।

अवसेसा जे भावा ते मज्झ परेत्ति णादव्वा ॥322॥

को णाम भणिज्ज बुहो णादुं सव्वे पराइए भावे । (300)

मज्झमिणंति य वयणं जाणंतो अप्पयं सुद्धं ॥323॥

थेयादी अवराहे जो कुव्वदि सो उ संकिदो भमइ । (301)

मा बज्जेज्जं केण वि चोरी त्ति जणम्हि वियरंतो ॥324॥

जो ण कुणदि अवराह सो णिस्संको दु जणवदि भमदि । (302)

ण वि तस्स बज्झिदुं जे चिंता उप्पज्जदि कयाइ ॥325॥

एवम्हि सावराहो बज्झामि अहं तु संकिदो चेदा । (303)

जइ पुण णिरावराहो णिस्संकोहं ण बज्झामि ॥326॥

संसिद्धिराधसिद्धं साधियमाराधिय च एयट्ठं । (304)
अवगदराधो जो खलु चेदा सो होदि अवराधो ॥327॥
जो पुण गिरावराधो चेदा णिस्संकिओ उ सो होइ । (305)
आराहणाइ णिच्चं वट्ठेइ अहं ति जाणंतो ॥ ॥

पडिकमणं पडिसरणं परिहारो धारणा णियत्ती य । (306)
णिंदा गरहा सोही अट्ठविहो होदि विसकुंभो ॥328॥
अप्पडिकमणप्पडिसरणं अप्परिहारो अधारणा चेव । (307)
अणियत्ती य अणिंदागरहासोही अमयकुंभो ॥329॥

सर्व-विशुद्ध अधिकार

दवियं जं उप्पज्जइ गुणेहिं तं तेहिं जाणसु अणण्णं । (308)
जह कडयादीहिं दु पज्जएहिं कणयं अणण्णमिह ॥330॥
जीवस्साजीवस्स दु जे परिणामा दु देसिदा सुत्ते । (309)
तं जीवमजीवं वा तेहिमणण्णं वियाणाहि ॥331॥
ण कुदोचि वि उप्पण्णो जम्हा कज्जं ण तेण सो आदा । (310)
उप्पादेदि ण किंचि वि कारणमवि तेण ण स होदि ॥332॥
कम्मं पडुच्च कत्त कत्तारं तह पडुच्च कम्माणि । (311)
उप्पज्जंति य णियमा सिद्धी दु ण दीसदे अण्णा ॥333॥

चेदा दु पयडीअट्ठं उप्पज्जइ विणस्सइ । (312)
पयडी वि चेययट्ठं उप्पज्जइ विणस्सइ ॥334॥
एवं बंधो उ दोण्हं पि अण्णोण्णप्पच्चया हवे । (313)
अप्पणो पयडीए य संसारो तेण जायदे ॥335॥

जा एस पयडीअटुं चेदा णेव विमुञ्चए । (314)

अयाणओ हवे ताव मिच्छादिट्ठी असंजओ ॥336॥

जदा विमुञ्चए चेदा कम्मफलमणंतयं । (315)

तदा विमुत्ते हवदि जाणओ पासओ मुणी ॥337॥

अण्णाणी कम्मफलं पयडिसहावट्ठिदो दु वेदेदि । (316)

णाणी पुण कम्मफलं जाणदि उदिदं ण वेदेदि ॥338॥

जो पुण णिरवराहो चेदा णिस्संकिदो दु सो होदि ।

आराहणाए णिच्चं वट्ठिदि अहमिदी वियाणन्तो ॥339॥

ण मुयदि पयडिमभव्वो सुट्ठु वि अज्झाइदूण सत्थाणि । (317)

गुडदुद्धं पि पिबंता ण पण्णया णिव्विसा होंति ॥340॥

णिव्वेयसमावण्णो णाणी कम्मफलं वियाणेदि । (318)

महुरं कडुयं बहुविहमवेयओ तेण सो होइ ॥341॥

ण वि कुव्वइ ण वि वेयइ णाणी कम्माइं बहुपयाराइं । (319) ।

जाणइ पुण कम्मफलं बंधं पुण्णं च पावं च ॥342॥

दिट्ठी जहेव णाणं अकारयं तह अवेदयं चेव । (320)

जाणइ य बंधमोक्खं कम्मदयं णिज्जरं चेव ॥343॥

लोयस्स कुणदि विण्हू सुरणारयतिरियमाणुसे सत्ते । (321)

समणाणं पि य अप्पा जदि कुव्वदि छव्विहे काए ॥344॥

लोयसमणाणमेयं सिद्धंतं जइ ण दीसदि विसेसो । (322)

लोयस्स कुणइ विण्हू समणाण वि अप्पओ कुणदि ॥345॥

एवं ण को वि मोक्खो दीसदि लोयसमणाणं दोण्ह पि । (323)

णिच्चं कुव्वंताणं सदेवमणुयासुरे लोए ॥346॥

ववहारभासिदेण दु परदव्वं मम भणंति अविदिदत्था । (324)
जाणंति णिच्छएण दु ण य मह परमाणुमित्तमवि किंचि ॥347॥
जह को वि णरो जंपदि अम्हं गामविसयणयरट्ठं । (225)
ण य होंति जस्स ताणि दु भणदि य मोहेण सो अप्पा ॥348॥
एमेव मिच्छदिट्ठी णाणी णीसंसयं हवदि एसो । (326)
जो परदव्वं मम इदि जाणंतो अप्पयं कुणदि ॥349॥
तम्हा ण मे ति णच्चा दोण्ह वि एदाण कत्तविवसायं । (327)
परदव्वे जाणंतो जाणेज्जो दिट्ठिरहिदाणं ॥350॥

केहिंचि दु पज्जएहिं विणस्सए णेव केहिंचि दु जीवो । (345)
जम्हा तम्हा कुव्वदि सो वा अण्णो व णेयंतो ॥351॥
केहिंचि दु पज्जएहिं विणस्सए णेव केहिंचि दु जीवो । (346)
जम्हा तम्हा वेददि सो वा अण्णो व णेयंतो ॥352॥
जो चेव कुणदि सो चिय ण वेदए जस्स एस सिद्धंतो । (347)
सो जीवो णादव्वो मिच्छादिट्ठी अणारिहदो ॥353॥
अण्णो करेदि अण्णो परिभुंजदि जस्स एस सिद्धंतो । (348)
सो जीवो णादव्वो मिच्छादिट्ठी अणारिहदो ॥354॥

मिच्छत्तं जदि पयडी मिच्छादिट्ठी करेदि अप्पाणं । (328)

तम्हा अचेदणा ते पयडी णणु कारगो पत्ते ॥355॥

सम्मत्ता जदि पयडी सम्मादिट्ठी करेदि अप्पाणं ।

तम्हा अचेदणा ते पयडी णणु कारगा पत्ता ॥356॥

अहवा एसो जीवो पोग्गलदव्वस्स कुणदि मिच्छत्तं । (329)

तम्हा पोग्गलदव्वं मिच्छादिट्ठी ण पुण जीवो ॥357॥

अह जीवो पयडी तह पोग्गलदव्वं कुणंति मिच्छत्तं । (330)

तम्हा दोहिं कदं तं दोण्णि वि भुंजंति तस्स फलं ॥358॥

अह ण पयडी ण जीवो पोग्गलदव्वं करेदि मिच्छत्तं । (331)

तम्हा पोग्गलदव्वं मिच्छत्तं तं तु ण हु मिच्छा ॥359॥

कम्मेहि दु अण्णाणी किज्जदि णाणी तहेव कम्मेहिं । (332)

कम्मेहि सुवाविज्जदि जग्गाविज्जदि तहेव कम्मेहिं ॥360॥

कम्मेहि सुहाविज्जदि दुक्खाविज्जदि तहेव कम्मेहिं । (333)

कम्मेहि य मिच्छत्तं णिज्जदि णिज्जदि असंजमं चेव ॥361॥

कम्मेहि भमाडिज्जदि उड्ढमहो चावि तिरियलोयं च । (334)

कम्मेहि चेव किज्जदि सुहासुहं जेतियं किंचि ॥362॥

जम्हा कम्मं कुव्वदि कम्मं देदि हरदि त्ति जं किंचि । (335)

तम्हा उ सव्वजीवा अकारगा होंति आवण्णा ॥363॥

पुरिसित्थियाहिलासी इत्थीकम्मं च पुरिसमहिलसदि । (336)

एसा आयरियपरंपरागदा एरिसी दु सुदी ॥364॥

तम्हा ण को वि जीवो अबंभचारी दु अम्ह उवदेसे । (337)

जम्हा कम्मं चेव हि कम्मं अहिलसदि इदि भणिदं ॥365॥

जम्हा घादेदि परं परेण घादिज्जदे य सा पयडी । (338)

एदेणत्थेण किर भण्णदि परघादणामेत्ति ॥366॥

तम्हा ण को वि जीवो वघादेओ अत्थि अम्ह उवदेसे । (339)

जम्हा कम्मं चेव हि कम्मं घादेदि इवि भणिदं ॥367॥

एवं संखुवएसं जे उ परूवेत्ति एरिसं समणा । (340)

तेसिं पयडी कुव्वदि अप्पा य अकारगा सव्वे ॥368॥

अहवा मण्णसि मज्झं अप्पा अप्पाणमप्पणो कुणदि । (341)

ऐसो मिच्छसहावो तुम्हं एयं मुणंतस्स ॥369॥

अप्पा णिच्चोऽसंखेज्जपदेसो देसिदो दु समयम्हि । (342)

ण वि सो सक्कदि तत्ते हीणो अहिओ य कादुं जे ॥370॥

जीवस्स जीवरूवं वित्थरदो जाण लोगमेत्तं खु । (343)

तत्ते सो किं हीणो अहिओ य कहं कुणदि दव्वं ॥371॥

अह जाणगो दु भावो णाणसहावेण अच्छदे त्ति मदं । (344)

तम्हा ण वि अप्पा अप्पयं तु सयमप्पणो कुणदि ॥372॥

दंसणणाणचरित्तं किंचि वि णत्थि दु अचेदणे विसए । (366)

तम्हा किं घादयदे चेदयिदा तेसु विसएसु ॥373॥

दंसणणाणचरित्तं किंचि वि णत्थि दु अचेदणे कम्मे । (367)

तम्हा किं घादयदे चेदयिदा तम्हि कम्मम्हि ॥374॥

दंसणणाणचरित्तं किंचि वि णत्थि दु अचेदणे काए । (368)

तम्हा किं घादयदे चेदयिदा तेसु काएसु ॥375॥

णाणस्स दंसणस्स य भणिदो घादो तहा चरित्तस्स । (369)

ण वि तहिं पोग्गलदव्वस्स को वि घादो दु णिद्धिट्ठो ॥376॥

जीवस्स जे गुणा केइ णत्थि खलु ते परेसु दव्वेसु । (370)

तम्हा सम्मादिट्ठिस्स णत्थि रागो दु विसएसु ॥377॥

रागो दोसो मोहो जीवस्सेव य अणण्णपरिणामा । (371)

एदेण कारणेण दु सद्दादिसु णत्थि रागादी ॥378॥

अण्णदविण्ण अण्णदवियस्स णो कीरए गुणुप्पाओ । (372)

तम्हा दु सव्वदव्वा उप्पज्जंते सहावेण ॥379॥

जह सिप्पिओ दु कम्मं कुव्वदि ण य सो दु तम्मओ होदि । (349)

तह जीवो वि य कम्मं कुव्वदि ण य तम्मओ होदि ॥380॥

जह सिप्पिओ दु करणेहिं कुव्वदि ण य सो दु तम्मओ होदि । (350)

तह जीवो करणेहिं कुव्वदि ण य तम्मओ होदि ॥381॥

जह सिप्पिओ दु करणाणि गिण्हदि ण सो दु तम्मओ होदि । (351)

तह जीवो करणाणि दु गिण्हदि ण य तम्मओ होदि ॥382॥

जह सिप्पिओ दु कम्मफलं भुंजदि ण सो दु तम्मओ होदि । (352)

तह जीवो कम्मफलं भुंजदि ण य तम्मओ होदि ॥383॥

एवं ववहारस्स दु वत्तव्वं दरिसणं समासेण । (353)

सुणु णिच्छयस्स वयणं परिणामकदं तु जं होदि ॥384॥

जह सिप्पिओ दु चेट्ठं कुव्वदि हवदि य तहा अणण्णो से । (354)

तह जीवो वि य कम्मं कुव्वदि हवदि य अणण्णो से ॥385॥

जह चेट्ठं कुव्वंतो दु सिप्पिओ णिच्चदुक्खिओ होदि । (355)

तत्तो सिया अणण्णो तह चेट्ठंतो दुही जीवो ॥386॥

जह सेडिया दु ण परस्स सेडिया सेडिया य सा होदि । (356)

तह जाणगो दु ण परस्स जाणगो जाणगो सो दु ॥387॥

जह सेडिया दु ण परस्स सेडिया सेडिया य सा होदि । (357)

तह पासगो दु ण परस्स पासगो पासगो सो दु ॥388॥

जह सेडिया दु ण परस्स सेडिया सेडिया य सा होदि । (358)

तह संजदो दु ण परस्स संजदो संजदो सो दु ॥389॥

जह सेडिया दु ण परस्स सेडिया सेडिया य सा होदि । (359)

तह दंसणं दु ण परस्स दंसणं दंसणं तं तु ॥390॥

एवं तु णिच्छयणयस्स भासिदं णाणदंसणचरित्ते । (360)

सुणु ववहारणयस्य य वत्तव्वं से समासेण ॥391॥

जह परदव्वं सेडदि हु सेडिया अप्पणो सहावेण । (361)

तह परदव्वं जाणदि णादा वि सएण भावेण ॥392॥

जह परदव्वं सेडदि हु सेडिया अप्पणो सहावेण । (362)

तह परदव्वं पस्सदि जीवो वि सएण भावेण ॥393॥

जह परदव्वं सेडदि हु सेडिया अप्पणो सहावेण । (363)

तह परदव्वं विजहदि णादा वि सएण भावेण ॥394॥

जह परदव्वं सेडदि हु सेडिया अप्पणो सहावेण । (364)

तह परदव्वं सद्दहदि सम्मदिट्ठी सहावेण ॥395॥

एवं ववहारस्स दु विणिच्छओ णाणदंसणचरित्ते । (365)

भणिदो अण्णेसु वि पज्जएसु एमेव णादव्वो ॥396॥

कम्मं जं पुव्वकयं सुहासुहमणेयवित्थरविसेसं । (383)

तत्तो णियत्तदे अप्पयं तु जो सो पडिक्कमणं ॥397॥

कम्मं जं सुहमसुहं जम्हि य भावम्हि बज्झदि भविस्सं । (384)

तत्तो णियत्तदे जो सो पच्चक्खाणं हवदि चेदा ॥398॥

जं सुहमसुहमुदिण्णं संपडि य अणेयवित्थरविसेसं । (385)

तं दोसं जो चेददि सो खलु आलोयणं चेदा ॥399॥

णिच्चं पच्चक्खाणं कुव्वदि णिच्चं पडिक्कमदि जो य । (386)

णिच्चं आलोचेयदि सो हु चरित्तं हवदि चेदा ॥400॥

णिंदिसंथुदवयणाणि पोग्गला परिणमंति बहुगाणि । (373)

ताणि सुणिदूय रूसदि तूसदि य पुणो अहं भणिदो ॥401॥

पोग्गलदव्वं सद्दत्तपरिणदं तस्स जदि गुणो अण्णो । (374)

तम्हा ण तुमं भणिदो किंचि वि किं रूससि अबुद्धो ॥402॥

असुहो सुहो व सद्दो ण तं भणदि सुणसु मं ति सो चेव । (375)

ण य एदि विणिग्गहिदुं सोदविसयमागदं सद्दं ॥403॥

असुहं सुहं व रूवं ण तं भणदि पेच्छ मं ति सो चेव । (376)

ण य एदि विणिग्गहिदुं चक्खुविसयमागदं रूवं ॥404॥

असुहो सुहो व गंधो ण तं भणदि जिग्घ मं ति सो चेव । (377)

ण य एदि विणिग्गहिदुं घाणविसयमागदं गंधं ॥405॥

असुहो सुहो व रसो ण तं भणदि रसय मं ति सो चेव । (378)

ण य एदि विणिग्गहिदुं रसणविसयमागदं तु रसं ॥406॥

असुहो सुहो व फासो ण तं भणदि फुससु मं ति सो चेव । (379)

ण य एदि विणिग्गहिदुं कायविसयमागदं फासं ॥407॥

असुहो सुहो व गुणो ण तं भणदि बुज्झ मं ति सो चेव । (380)

ण य एदि विणिग्गहिदुं बुद्धिविसयमागदं तु गुणं ॥408॥

असुहं सुहं व दव्वं ण तं भणदि बुज्झ मं ति सो चेव । (381)

ण य एदि विणिग्गहिदुं बुद्धिविसयमागदं दव्वं ॥409॥

एयं तु जाणिऊणं उवसमं णेव गच्छदे मूढो । (382)

णिग्गहमणा परस्स य सयं च बुद्धिं सिवमपत्ते ॥410॥

वेदंतो कम्मफलं अप्पाणं कुणदि जो दु कम्मफलं । (387)

सो तं पुणो वि बंधदि बीयं दुक्खस्स अट्ठविहं ॥411॥

वेदंतो कम्मफलं मए कदं मुणदि जो दु कम्मफलं । (388)

सो तं पुणो वि बंधदि बीयं दुक्खस्स अट्ठविहं ॥412॥

वेदंतो कम्मफलं सुहिदो दुहिदो य हवदि जो चेदा । (389)

सो तं पुणो वि बंधदि बीयं दुक्खस्स अट्ठविहं ॥413॥

सत्थं णाणं ण हवदि जम्हा सत्थं ण याणदे किंचि । (390)
तम्हा अण्णं णाणं अण्णं सत्थं जिणा बेति ॥414॥
सद्दो णाणं ण हवदि जम्हा सद्दो ण याणदे किंचि । (391)
तम्हा अण्णं णाणं अण्णं सद्दं जिणा बेति ॥415॥
रूवं णाणं ण हवदि जम्हा रूवं ण याणदे किंचि । (392)
तम्हा अण्णं णाणं अण्णं रूवं जिणा बेति ॥416॥
वण्णो णाणं ण हवदि जम्हा वण्णो ण याणदे किंचि । (393)
तम्हा अण्णं णाणं अण्णं वण्णं जिणा बेति ॥417॥
गंधो णाणं ण हवदि जम्हा गंधो ण याणदे किंचि । (394)
तम्हा अण्णं णाणं अण्णं गंधं जिणा बेति ॥418॥
ण रसो दु हवदि णाणं जम्हा दु रसो ण याणदे किंचि । (395)
तम्हा अण्णं णाणं रसं च अण्णं जिणा बेति ॥419॥
फासो ण हवदि णाणं जम्हा फासो य याणदे किंचि । (396)
तम्हा अण्णं णाणं अण्णं फासं जिणा बेति ॥420॥
कम्मं णाणं ण हवदि जम्हा कम्मं ण याणदे किंचि । (397)
तम्हा अण्णं णाणं अण्णं कम्मं जिणा बेति ॥421॥
धम्मो णाणं ण हवदि जम्हा धम्मो ण याणदे किंचि । (398)
तम्हा अण्णं णाणं अण्णं धम्मं जिणा बेति ॥422॥
णाणमधम्मो ण हवदि जम्हाधम्मो ण याणदे किंचि । (399)
तम्हा अण्णं णाणं अण्णमधम्मं जिणा बेति ॥423॥
कालो णाणं ण हवदि जम्हा कालो ण याणदे किंचि । (400)
तम्हा अण्णं णाणं अण्णं कालं जिणा बेति ॥424॥
आयासं पि ण णाणं जम्हायासं ण याणदे किंचि । (401)
तम्हायासं अण्णं अण्णं णाणं जिणा बेति ॥425॥
णज्झवसाणं णाणं अज्झवसाणं अचेदणं जम्हा । (402)

तम्हा अण्णं णाणं अज्झवसाणं तहा अण्णं ॥426॥

जम्हा जाणदि णिच्चं तम्हा जीवो दु जाणगो णाणी । (403)

णाणं च जाणयादो अव्वदिरित्तं मुणेयव्वं ॥427॥

णाणं सम्मादिट्ठिं दु संजमं सुत्तमंगपुव्वगयं । (404)

धम्माधम्मं च तहा पव्वज्जं अभुवंति बुहा ॥428॥

अत्ता जस्सामुत्ते ण हु सो आहारगो हवदि एवं । (405)

आहारो खलु मुत्ते जम्हा सो पोग्गलमओ दु ॥429॥

णवि सक्कदि घेतुं जं ण विमोत्तुं जं च जं परद्वव्वं । (406)

सो कोवि य तस्स गुणो पाउगिओ विस्ससो वा वि ॥430॥

तम्हा दु जो विसुद्धो चेदा सो णेव गेण्हदे किंचि । (407)

णेव विमुंचदि किंचि वि जीवाजीवाण दव्वाणं ॥431॥

पासंडीलिंगाणि व गिहिलिंगाणि व बहुप्पयाराणि । (408)

घेतुं वदंति मूढा लिंगमिणं मोक्खमग्गो त्ति ॥432॥

ण दु होदि मोक्खमग्गो लिंगं जं देहणिम्ममा अरिहा । (409)

लिंगं मुइत्तु दंसणणाणचरित्तणि सेवंति ॥433॥

ण वि एस मोक्खमग्गो पासंडीगिहिमयाणि लिंगाणि । (410)

दंसणणाणचरित्तणि मोक्खमग्गं जिणा बेत्ति ॥434॥

तम्हा जहित्तु लिंगे सागारणगारएहिं वा गहिदे । (411)

दंसणणाणचरित्ते अप्पाणं जुंज मोक्खपहे ॥435॥

मोक्खपहे अप्पाणं ठवेहि तं चेव झाहि तं चेय । (412)

तत्थेव विहर णिच्चं मा विहरसु अण्णदव्वसु ॥436॥

पासंडीलिंगेसु व गिहिलिंगेसु व बहुप्पयारेसु । (413)

कुव्वंति जे ममत्तिं तेहिं ण णादं समयसारं ॥437॥

ववहारिओ पुण णओ दोण्णि वि लिंगाणि भणदि मोक्खपहे । (414)

णिच्छयणओ ण इच्छदि मोक्खपहे सव्वलिंगाणि ॥438॥

जो समयपाहुडमिणं पढिदूणं अत्थतच्चदो णादुं । (415)

अत्थे ठाही चेदा सो होही उत्तमं सोक्खं ॥439॥

परिशिष्ट

परिशिष्ट

पाठ-स्रोत: मूल गाथाएँ जैन गाथा डेटाबेस (टंकण-श्रेय: Nikky Jain, nikkyjain.github.io) से — केवल प्राचीन मूल पाठ लिया गया है; अनुवाद/अन्वयार्थ सम्मिलित नहीं · मूल पाठ प्राचीन एवं public domain; टंकण-श्रेय यथोक्त · मूल e-text ↗
यह मूल पाठ है — अर्थ/टीका सम्मिलित नहीं। अशुद्धि दिखे तो GitHub पर [shastra/samayasaara.md](#) सुधारें।